

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ŽEPČU
Broj: 44 0 K 042273 25 Kpp
Žepče, 05.06.2025.godine

Općinski sud u Žepču, sudac za prethodni postupak Dragica Dragičević, uz sudjelovanje zapisničara Dragane Đuzel, u krivičnom predmetu protiv osumnjičenog M.T. zbog produženog kaznenog djela Nasilje u porodici iz člana 222. stav 4. u vezi sa stavom 2. i članom 55. KZ F BiH., odlučujući o prijedlogu za određivanje mjere pritvora, Kantonalnog tužiteljstva Ze-do kantona broj: T04 0 KTD 0064135 25 od 05.06.2025.godine, nakon održanog ročišta po prijedlogu za određivanje pritvora dana 05.06.2025.godine u nazočnosti osumnjičenog M.T. i njegova određenog branitelja odvjetnika Miroslava Tadić iz Žepča, iz razloga predviđenih člankom 146. stavak 1. točka b) i c) ZKP-a FBiH, na temelju članka 148. ZKP FBiH dana 05.06.2025.godine donio je:

R J E Š E N J E

Osumnjičenom **M.T.**, zvan *„M.*, sin ..., rođen ... godine u Z., nastanjen u... Ž., pismen, sa završenom osnovnom školom, NK radnik, oženjen, otac troje djece, srednjeg imovnog stanja, po nacionalnosti Bošnjak, državljanin BiH, JMB: ..., osuđivan,

temeljem odredbe članka 146. stavak 1. točke b) i c). ZKP FBiH

ODREĐUJE SE PRITVOR

u trajanju od jedan (1) mjesec dana, a počinje da teče od **05.06.2025.godine u 08:35 sati**, i trajat će do dana **04.07.2025.godine do 08:35 sati** ili do drugačije odluke suda.

Žalba protiv ovog rješenja ne odlaže njegovo izvršenje.

O b r a z l o ž e n j e

Kantonalno tužiteljstvo ZE-DO kantona Zenica, podnijelo je ovom sudu prijedlog za određivanje pritvora broj: T04 0 KTD 0064135 25 od 05.06.2025.godine, prema osumnjičenom M.T., protiv kojeg se vodi istražni postupak zbog produženog kaznenog djela Nasilje u porodici iz člana 222. stav 4. u vezi sa stavom 2. i članom 55. KZ F BiH iz osnova predviđenih člankom 146. stavak 1. točke b) i c) ZKP FBiH.

Osumnjičeni se tereti da je:

„1.dana 15.07.2024. godine, oko 21,30 sati, na području općine Žepče, u porodičnoj kući, koja se nalazi u ulici (...), u kojoj živi sa suprugom A.T. i troje mldb. djece Mldb.1., Mldb.2. i Mldb.3. (rođen ... godine), nasiljem, drskim i bezobzirnim ponašanjem ugrozio mir, psihičko zdravlje i tjelesnu cjelovitost svoje supruge A.T. i svoje mldb. djece na način da je, nakon međusobne verbalne prepirke, u prisustvu mldb. djece, A.T. počeo daviti tako što je rukama hvatao u predjelu vrata i zadavao udarce u predjelu leđa nakon čega je više puta otvorenim dlanom u predjelu lica udario Mldb.1 iako je bio svjestan da ovakvim drskim i bezobzirnim ponašanjem i nasiljem ugrožava mir i tjelesnu cjelovitost članova svoje porodice sa kojim živi u zajedničkom domaćinstvu, to i htio, pa im je nastavio upućivati ozbiljne prijetnje da će zapaliti kuću i da će ih sasjeci te je A.T. oduzeo mobilni telefon kako ne bi pozvala policiju, što je kod oštećenih izazvalo veliku dozu straha i uznemirenosti, pa je A.T. narednog dana događaj prijavila Policijskoj stanici Žepče,

dakle da bi, drskim i bezobzirnim ponašanjem i nasiljem ugrozio mir i tjelesnu cjelovitost članova porodice sa kojima živi u zajedničkom domaćinstvu među kojima su i mldb. djeca,

2.dana 03.06.2025. godine, oko 21,30 sati, na području općine Žepče, u porodičnoj kući, koja se nalazi u ulici (...), u kojoj živi sa suprugom A.T. i troje mldb. djece Mldb.1, Mldb.2 i Mldb.3, nasiljem, drskim i bezobzirnim ponašanjem ugrozio mir, psihičko zdravlje i tjelesnu cjelovitost svoje supruge A.T. i svoje mldb. djece na način da je, nakon što se doveo u alkoholizirano stanje, u prisustvu mldb. djece, vrijeđao suprugu A.T. i ozbiljno joj prijetio riječima da će je zaklati, ubiti, pa je istu gađao kućanskim predmetima, te je počeo daviti tako što je rukama hvatao u predjelu vrata i zadavao udarce u predjelu glave kojom prilikom je istoj slomio jedan zub, nakon čega je otvorenim dlanom u predjelu lica udario Mldb.1, iako je bio svjestan da ovakvim drskim i bezobzirnim ponašanjem i nasiljem ugrožava mir i tjelesnu cjelovitost članova svoje porodice sa kojim živi u zajedničkom domaćinstvu, to i htio, te je A.T. i Mldb.1 oduzeo mobilne telefone kako ne bi pozvale policiju, što je kod oštećenih izazvalo veliku dozu straha i uznemirenosti, pa je A.T. narednog dana događaj prijavila Policijskoj stanici Žepče,

dakle da bi, drskim i bezobzirnim ponašanjem i nasiljem ugrozio mir i tjelesnu cjelovitost članova porodice sa kojima živi u zajedničkom domaćinstvu među kojima su i mldb. djeca,,

čime da bi počinio produženo krivično djelo Nasilje u porodici iz člana 222. stav 4. u vezi sa stavom 2. i članom 55. KZ F BiH.“

Tužiteljstvo navodi da osnovana sumnja da je osumnjičeni počinio krivično djelo koje mu se stavlja na teret proizlazi iz sljedećih dokaza:

Fco. Izvještaj o počinjenom krivičnom djelu PS Žepče broj: 08-02-13/1-03-2-1798-2/24 od 19.11.2024. godine i prilozi uz isti:

Fco. Obrazac prijave nasilja u porodici PS Žepče broj: 08-02-13/1-954/24 od 16.07.2024. godine;

Fco. Zapisnik o saslušanju svjedoka oštećene A.T. PS Žepče broj: 08-02-13/1-345/24 od 16.07.2024. godine,

Fco. Zapisnik o ispitivanju prisutnosti alkohola opojnih droga ili lijekova u organizmu ispitanika PS Žepče od 16.07.2024. godine na ime M.T.;

Fco. Zapisnik o prijemu usmene prijave PS Žepče broj: 08-02-13/1-345/24 od 16.07.2024. godine;

Fco. Zapisnik o ispitivanju osumnjičenog M.T. PS Žepče broj: 08-02-13/1-346/24 od 17.07.2024. godine;

Fco. Zahtjev za izricanje zaštitne mjere PS Žepče broj: 08-02-13/1-03-2-1198/24 od 17.07.2024. godine;

Fco. Rješenje Općinskog suda u Žepču broj: 44 0 Pr 040978 24 Zm od 17.07.2024. godine;

Fco. Fotodokumentacija PS Žepče broj: 08-02-13/1-345-1/24 od 16.07.2024. godine;

Izvještaj o počinjenom krivičnom djelu PS Žepče broj: 08-02-13/1-03-2-1431/25/DM od 04.06.2025. godine i prilozi uz isti:

Zapisnik o prijemu usmene prijave PS Žepče broj: 08-02-13/1-301/25 od 04.06.2025. godine;

Zapisnik o saslušanju svjedoka oštećene A.T. PS Žepče broj :08-02-13/1-301/25 od 04.06.2025. godine,

Fco fotodokumentacije PS Žepče broj :08-02-13/1-301/25 od 04.06.2025. godine,

Zapisnik o konsultaciji sa organom starateljstva kod predlaganja zaštitnih mjera PS Žepče broj: 08-02-13/1-301-1/25/DM od 04.06.2025. godine;

Zapažanje o prijavljenom nasilju u obitelji i pitanja za žrtvu nasilja-percepciju žrtve PS Žepče broj: 08-02-13/1-301/25 od 04.06.2025. godine,
Ocjena rizika od ponavljanja nasilja u obitelji PS Žepče broj: 08-02-13/1-301/25 od 04.06.2025. godine;
Fco Izvoda iz prekršajne evidencije za M.T. od 04.06.2025. godine;
Fco Izvoda iz kaznene evidencije za M.T. PU I Zenica od 04.06.2025. godine;
Fco ljekarskog nalaza DZ Žepče broj: 5214 od 04.06.2025. godine na ime A.T.;
Fco zapisnika o lišenju slobode PS Žepče broj: 08-02-13/1-LS/74/25 od 04.06.2025. godine;
Fco potvrde o privremenom oduzimanju predmeta PS Žepče broj: 08-02-13/1-LS-74/25 od 04.06.2025. godine na ime M.T.;
Zapisnik o ispitivanju osumnjičenog M.T. PS Žepče broj: 08-02-13/1-302/25 od 04.06.2025. godine;
Zapisnik o predaji osobe lišene slobode nadležnom tužitelju PS Žepče od 05.06.2025. godine;
Zapisnik o ispitivanju osumnjičenog M.T. KT ZDK broj T04 0 KTD 0064135 25 od 05.06.2025. godine.

Analizirajući naprijed navedene dokaze, tužiteljstvo nalazi osnovanu sumnju da je osumnjičeni počinio kirivično djelo za koje se tereti posebno iz iskaza oštećene A.T. koja je svjedočila da je osumnjičeni nasilan prema njoj i djeci posebno kada je u alkoholiziranom stanju te da ih u tom stanju maltretira psihički i fizički. Također je svjedočila da je već do sada odgovarao zbog krivičnog djela nasilje u obitelji te da mu je izrečena uvjetna osuda sa vremenom provjeravanja u trajanju od dvije godine te da je po isteku izrečenih zaštitnih mjera nastavio sa vršenjem nasilja u obitelji, tako da ju je hvatao za vrat, udarao po leđima, ošamario curicu, i to pod okolnostima od dana 15.07.2024.godine sprječavanja da nasilje prijavi policiji oduzimajući kako od nje tako i od kćerke telefon. Zbog prijetnji da će zapaliti kuću te sasjeci nju i djecu osjeća strah kako za sebe tako i za djecu zbog čega je donijela odluku napuštanja kuće i odlaska kod svojih roditelja. Nadalje nasilje počinjeno dana 03.06.2025.godine imalo je za posljedicu nanošenje teških tjelesnih ozljeda tako da je oštećenoj A.T. izbijen zub.

Što se tiče razloga za određivanje mjere pritvora tužilaštvo navodi slijedeće:

- Da je osumnjičeni do sada osuđivan presudom općinskog suda u Žepču broj 44 0 K 034462 22 K od 05.08.2023.godine i to za isto krivično djelo, odnosno krivično djelo nasilja u porodici iz čl.222. st.2. KZ FBiH.
- Da je osumnjičenom izricana zaštitna mjera zabrana približavanja žrtvi nasilja – A.T. zabrana uznemiravanja i uhođenja i zaštitna mjera obaveznog liječenja od ovisnosti od alkohola, u trajanju od 6 mjeseci.
- Da iz ocjene rizika od ponavljanja nasilja u porodici sačinjene od strane PS u Žepču broj 08-02-13/1-301/25 od 04.06.2025.godine, proizlazi da postoji visok rizik od novog nasilja u ovoj porodici.
- Da iz fotodokumentacije i nalaza JU Doma zdravlja Žepče proizlazi da je kod žrtve nasilja dana 04.06.2025.godine došlo do pucanja lijevog očnjaka gornje vilice.
- Da postoje naročite okolnosti koje ukazuju da će osumnjičeni ometati krivični postupak uticajem na svjedoke i to mladb djecu a i žrtvu nasilja A.T. koji bi mogli koristiti se pravom da odbiju svjedočenje protiv oca – supruga.
- Da postoje razlozi za određivanje pritvora zbog postojanja naročitih okolnosti koje opravdavaju bojazan da će osumnjičeni ponoviti krivično djelo ili počiniti krivično djelo kojim prijeti iz razloga što je povratnik u izvršenju krivičnih djela jer je odmah nakon isteka zaštitne mjere ponovio nasilje a što sve proizlazi iz kaznene i prekršajne evidencije koja ukazuje da se radi o osobi sklonoj nasilnom ponašanju.

Zbog naprijed navedenog tužiteljstvo je mišljenja da postoji opravdan bojazan da bi osumnjičeni puštanjem na slobodu ponovio krivično djelo koje je već učinio ili krivično djelo kojim prijeti riječima da će ih „sasijecati, ubiti, zaklati”

U povodu prijedloga za određivanje pritvora, sud je održao ročište dana 05.06.2025.godine.

Na održanom ročištu branitelj osumnjičenog je izjavio: „Mi se protivimo prijedlogu kantonalnog tužiteljstva za određivanje pritvora iz razloga što ne postoji opasnost utjecaja na svjedoke jer je oštećena A.T., supruga osumnjičenog dana 04.06.2025.godine saslušana kod PS Žepče te je zapisnik o njenom saslušanju priložen uz zahtjev za određivanje pritvora. Mldb kćerka nije saslušana ali i sam osumnjičeni nije negirao u svom saslušanju da je počinio određeno nasilje ali je isto učinio u afektu zbog verbalnog sukoba sa svojom suprugom. Iako se osumnjičeni tereti za produženo krivično djelo ističem da između ova dva djela je prošao period od skoro godinu dana. Nakon razgovora sa osumnjičenim utvrdio sam da isti radi kao građevinski radnik te da ga vlasnik firme želi prijaviti na osiguranje te ukoliko mu bude određen pritvor izgubit će taj posao a njegova zarada je jedini prihod njegove obitelji te će biti ugrožena njihova egzistencija. Smatram da se osumnjičenom treba odrediti mjera zabrane približavanja žrtvama nasilja i zabrana uznemiravanja i kontaktiranja, a on izražava duboko žaljenje zbog svojih postupaka. Stoga predlažem da sud odbije prijedlog Kantonalnog tužiteljstva Zenica, ali da osumnjičenom izrekne mjere zabrane približavanja, uznemiravanja i kontaktiranja sa žrtvama nasilja. Ni njegova supruga A.T. u svom iskazu nije tražila da mu se izrekne mjera pritvora već je navela da je ona sa djecom već otišla kod roditelja u (...) te je smatrala da on može ostati u svojoj obiteljskoj kući u (...).”

Osumnjičeni se pridružio obrani svog branitelja.

Sud podsjeća obranu da u ovoj fazi postupka, kada istraga još nije okončana, već je donešena Naredba o provođenju istrage pod poslovnim tužilačkim brojem T04 0 KTD 0064135 25 od 05.06.2025.godine i kada mldb djeca nisu saslušana a bez obzira što je supruga A.T. saslušana u daljem tijeku postupka sukladno odredbi članka 97. ZKP FBiH pod utjecajem osumnjičenog koji bi bio na slobodi mogli bi odbiti svjedočenje.

Sud također podsjeća obranu da postojanje uvjerenja o osnovanoj sumnji o počinjenju produženog krivičnog djela nasilja u obitelji iz članka 222. st.4. u vezi sa st.2. i člankom 55. KZ FBiH, predstavlja niži stepen uvjerenja da je djelo počinjeno od strane određenog lica, u odnosu na onaj stepen uvjerenja koji mora postojati u daljem tijeku postupka, odnosno nakon podizanja i eventualnog potvrđivanja optužnice. Imajući u vidu naprijed navedeno, prigovore branitelja koji su usmjereni u tom pravcu, ovaj sud smatra neosnovanim.

Cijeneći tužilački prijedlog a posebno tvrdnju da postoji osnovana sumnja da je osumnjičeni počinio produženo kazneno djelo Nasilje u porodici iz člana 222. stav 4. u vezi sa stavom 2. i članom 55. KZ FBiH, sud je prihvatio posebno iz razloga što osnovana sumnja proizlazi iz naredbe o provođenju istrage koju je tužitelj donio dana 05.06.2025.godine, kao i dokaza koje je priložilo uz prijedlog za određivanje pritvora, naprijed navedenih.

Pored postojanja osnovane sumnje da je osumnjičeni izvršio predmetno krivično djelo koje je naprijed obrazloženo, postoje razlozi za određivanje pritvora koje je tužiteljstvo predložilo protiv istog. Da postoje razlozi propisani člankom 146. stavak 1. točka b) i c). ZKP FBiH proizlazi iz osnova sumnje da je osumnjičeni djelo počinio na naročito ponižavajući način i da je njegova svirepost prešla mjeru koja je svojstvena izvršenju krivičnih djela, posebno iz razloga što stoje osnovi sumnje da je osumnjičeni prijetio da će ih „sasijeci, ubiti, zaklati” .

Da postoje razlozi za određivanje pritvora propisanih čl.146. st.1. t. b) ZKP FBiH proizlazi zbog činjenice da nisu ispitani svjedoci a postoje naročite okolnosti koje ukazuju na bojazan da će osumnjičeni ometati krivični postupak uticajem na svjedoke i to Mldb.1 i Mldb.2 djeca osumnjičenog, a i žrtvu nasilja A.T. da bi mogla koristiti se pravom da odbije svjedočenje protiv supruge sukladno odredbi članka 97. ZKP FBiH utjecajem osumnjičenog koji bi bio na slobodi.

Da postoje razlozi za određivanje pritvora propisanih čl.146. st.1. t. c) ZKP FBiH proizlazi zbog postojanja naročitih okolnosti koje opravdavaju bojazan da bi osumnjičeni puštanjem na slobodu ponovio krivično djelo koje je već učinio ili krivično djelo kojim prijeti („sasijeći, ubiti, zaklati”) jer je povratnik u izvršenju istovrsnih krivičnih djela što proizlazi iz pravomoćne presude Općinskog suda u Žepču broj 44 0 K 034462 22 K od 05.08.2023.godine.

Nadalje, da je ostvaren i objektivni uvjet pritvora po ovom osnovu, koji se ogleda u zapriječenoj kazni za ovo krivično djelo gdje se može izreći kazna zatvora u trajanju od 1 do 5 godina, dakle može se izreći kazna zatvora od 3 godine ili teža, zbog čega je ispunjen i kumulativni zahtjev odredbe članka 146. stavak 1. točka c) ZKP FBiH

Pri ocjeni naročitih okolnosti sud je analizirao i ispitao sve tri grupe okolnosti i to : 1.okolnosti djela, 2.osobna svojstva osumnjičenog, i 3.socijalne faktore.

Okolnosti djela ukazuju na osnovanu sumnju da je djelo izvršeno pred mldb djecom i nad mldb djecom osim nad suprugom kao žrtvama nasilja, na podmukao način zbog okolnosti da je pokušao prikriti izvršenje krivičnog djela uzimajući i skrivajući mobilne telefone kako ne bi žrtve nasilja mogle prijaviti počinjeno krivično djelo i osigurati sebi zaštitu.

Osobna svojstva osumnjičenog ogledaju se u sklonosti konzumiranju alkohola i kriminogenim svojstvima osumnjičenog da ponavlja istovrsna krivična djela.

Socijalni faktor u okruženju ukazuju na bojazan da osumnjičeni često izvrše krivično djelo kojim prijete, zbog čega je neophodno prevenirati i spriječiti nastanak znatno teže posljedice.

Prilikom razmatranja osnovanosti prijedloga tužiteljstva za određivanje pritvora, kao i prijedloga obrane da se prema osumnjičenog izreknu mjere zabrane, sud je imao u vidu da je osnovno pravo osumnjičenog predviđeno čl. 5. st.3. Europske konvencije o ljudskim pravima , pravo na slobodu. Stoga je razmotrio mogućnost da se prema osumnjičenom eventualno odredi druga mjera u smislu odredbe članka 137. st.2. ZKP FBiH. Naime, čl. 137. st.2. ZKP FBiH obvezuje sud da vodi računa da se ne primjenjuje teža mjera, ako se ista svrha može postići blažom mjerom. Sud je imao u vidu navedenu imperativnu normu, te je razmotrio prijedlog obrane o mogućnosti izricanja drugih mjera iz članka 140 i 140 a) ZKP FBiH. Međutim, svestranom analizom svih okolnosti prethodno pobrojanih sud je zaključio da postoje objektivni razlozi koji opravdavaju izricanje najteže mjere odnosno mjere pritvora prema osumnjičenom. Te objektivne okolnosti su naprijed navedene, pa stoga potoji opravdan bojazan od recidiva izvršenja krivičnih djela od strane osumnjičenog u slučaju puštanja na slobodu kao i opasnost utjecaja osumnjičenog na svjedoke koji će se saslušavati u tijeku postupka.

Radi toga u smislu članka 146. stavak 1. točka b) i c). ZKP FBiH, osumnjičenom je neophodno odrediti pritvor jer su za takvu odluku ispunjeni zakonski uvjeti, dok se nasuprot tome isti cilj ne može ostvariti nekom drugom mjerom, odnosno mjerom zabrane.

Sudac za prethodni postupak
Dragica Dragičević

POUKA: Protiv ovog rješenja može se izjaviti žalba krivičnom vijeću ovog suda, u roku od 24 sata od prijema rješenja. Žalba ne zadržava izvršenje rješenja.